

Ebe ni iPo^{lu} o kẹkẹ ghi ẹgbọ **IGalesha** **Eni e miesuo**

¹ Mhẹmhẹ iPo^{lu} aghiusomhi na kẹkẹ ni ọa khi obọ oyi ẹgbọ mhi te bhale, wẹkhi obọ oyi ọgbọ a te ghie mhẹ, ama obọ oyi iJesu iKirisiti ali Ẹshinẹgba Ita ni ọ rọte eghuli guise ọli le mhi te bhale, mhẹmhẹ mhi kẹkẹ ebe ona. ² Mhẹmhẹ ali inyoghuo ni e miesuo nya ni e nu mhẹ la, anye ga tse igbaa nya eyi eni e mie iJesu iKirisiti suo ni e la ẹoli iGalesha nya.

³ Ẹshinẹgba itawa ali iJesu iKirisiti Onomhẹ ọyawa e ka li okhale na ẹ, e ri opfomhẹ na ẹ. ⁴ Lọli ọ ri egbọli bhale shi iluasobo shi olamhẹ eyawa ni ọ rọ pfa awa shi eke agbọ ọkhọlọ ali agbọ ingmobe ni awa la ena abi o ghọle Ẹshinẹgba ọyawa ni ọ gbo khi ita awa. ⁵ Lọli a ri ufumhi ya na ya ramhi ẹle na agbọagbọ. Atse.

Usomhi onete olese ọa ke la ọ

⁶ Abọ e sha mhẹ khi a she gbẹ kie oni ọ rọte isomhalemhi oyi iKirisiti lu ẹ, a mu egbe nyenẹ ẹ deba usomhi onete olese ni o khili ọda, ⁷ ni o khia khi ẹa fe ga khi usomhi onete. O rọkhasẹ khi ẹgbọ eghuo e she pfi ẹ lo omunu ali khi ẹẹ dua ni e mu usomhi onete oyi iKirisiti ukhomhi pfi kpọkẹ ⁸ Ama ini otseku khi aanye, okekhi aḡeni ni ọ rọte iloghie tiemhile, ọ ya gue usomhi olese ye ẹ ni o khi ọda shi oni anye kpẹ gue ye ẹ, a zẹ ni a rue ọli shi ọgbọ ni a she pfa ẹzọ mu je ilimhi iriẹriẹ.

⁹ Abi anye kpẹ ngme lọli mhi gbo riẹle ngme memena, khi ini ọgbọ ọ bhale ya gue usomhi onete olese ye ẹ ni o khi ọda shi oni a miesuo, ọni a pfa ẹzo mu ọ pfua agboagbo ọ khi!

¹⁰ Eri mhia nono ni ẹgbọ e ba mie shi mhe ọ abi khi Ẹshinegba mhia nono ni ọ mie shi mhe ọ? Abi khi ẹgbọ mhia nono ni mhi ri egbe mu? Ini o khia khi ẹgbọ mhi kiele a nono ni mhi ri egbe mu lo, mhi aa kha khi aghiusomhi ọyi iKirisiti.

Ẹshinegba ọ lu iPọlu

¹¹ Mhia nono ni mhi gueye ẹ inyoghuo-mhe khi usomhi onete ni mhi ro ọ tse abo ọa khi obọ oyi ọgbọ o te bhale. ¹² Mhi aa rote obọ oyi ọgbokhoghuo mie ọli, wekhi eri a sese mhe lue. Ime-alo mhi te mie ọli rote obọ oyi iJesu iKirisiti.

¹³ Irari khi a she kpẹ suo mhe eko abi mhi ro la ugamhi oyi ẹgbọ iJu, abi mhi li lolo roshẹka ẹ mu okhọli vule shi ena igbaa oyi eni e mie iJesu iKirisiti suo oyi Ẹshinegba ọ. Mhi roshẹka ini mhi yese imiesuo oyewe-a.* ¹⁴ Mhi fu shi oni ugamhi ẹgbọ iJu dose ebubu ẹgbọ ni anye la otu oghuo,

ali mhi mholi omuegbe shi ishi eyi eni e bia mhe.† ¹⁵ Ama abi Ẹshinegba ni ọ rote eke ze mhe kee neni inyemhe ọ bia mhe, ni ọ lu mhe rote okhale oyoli. Egbe mu ọli khi ¹⁶ ọ ri omiọli khase mhe ni a bhale ya ẹ khi mhi ri ọli tsabo ifuabo ẹgbọ iJeta. Mhi aa vu ya mhila ọgbokhoghuo,‡ ¹⁷ wekhi eri mhi je ẹoli iJerusalemu ya me eni e khi ighiusomhi na kee,

* **1:13** Li ze Ika 8.3; 22.4-5; 26.9-11 † **1:14** Li ze Ika 22.3 ‡ **1:16** Li ze Ika 9.3-6; 22.6-10; 26.13-18

neni ọ zẹ mhe, ama eri mhi je eke Arebia ali mhi tigbe nyene egbe jele ọli iDamasiḱosi.

¹⁸ Abi ikpe ese e ro dose se, mhi ro tigbe nga iJerusalemu ni mhemhe ali iPita anye lese egbe, mhi nu ọli la ogbele igbeshe. § ¹⁹ Mhi aa me aghiusomhi na kee olese se khi iJemhisi ni o khi inyoghuo Onomhue.

²⁰ Mhia gueye e ukpeloe Eshinegba khi emini mhi keke e ghi e ea khi egbholi. ²¹ Elelese, mhi je eke iSiria ali eke iSilisha. ²² Ogbokhoghuo ọa la elemhi igbaa nya eyi eni e mie iJesu iKirisiti suo na eke iJudia ni o me mhe ukpeloe ghue. ²³ Eko ni e lese suo khi: “Oni omose ni o kpe mu okholi vule shi awa o, eri o ke tsabo oni ungmemhi irudunga oni o kpe dua ni lue yese-a.” ²⁴ E kueghie Eshinegba itobo oyemhe.

2

Ighiusomhi na ke e mie IPolu

¹ Ikpe igbene e dose, mhi nga iJerusalemu. Utona, iBanabasi o deba mhe. Mhi li gbo rue iTatosi.* ² Eri mhi nga obo ni mhi ro ri imealo ni mhi me gbe akanya, ali ni mhi rokhasẹ we usomhi onete ni mhi ro o tse abo ifuabo egbo iJeta. Ama eri mhi bena ri ele ona khasẹ egbo ni e khi eni ee ralo, irari khi ulishi oo mu mhe ini ikanya ni mhi kpe gbe ghue ali ena ikpukhokho eyemhe e ya khi afue. ³ ITatosi ni o nu mhe kia, aa lie khi o mema shele-a, abi o tseku khi ongi iGiriki. ⁴ Eri ingme oshẹle onana o lasẹle irari khi inyoghuo eghuo ena egbholi e bena

§ **1:18** Li zẹ Ika 9.26-30 * **2:1** Li zẹ Ika 11.30; 15.2

lo anye ifuabo, ni e ba me asha guano udi epfua ni iJesu iKirisiti o ro na anye, mu anye ighumha. ⁵ Ama anye ea tigbe lama na we ukuku eghēghē ni a ro bhale ya e khi igesikia oyi oni usomhi onete o nu e kie la.

⁶ Egbō eni e bino egbewe khi wewe e mu eloe, ea mu mhe eloe, irari khi Eshinegba o a mhuē oni o kpe mhe ne, ali khi abi ogbō li edato o a roli e gue ogbō ezō. Eni egbō eghoghō ea mhuē emini e ro ma mhe usomhi onete.† ⁷ Ama eri e me khi a she ri akanya itsabo usomhi onete ghi egbō iJeta nga mhe obō, ezeze abi a li li ghie iPita ghi egbō iJu. ⁸ Irari khi abi Eshinegba o li nu iPita e gbe akanya abi aghiusomhi na kee ni a ghie ghi egbō iJu, igho o li nu mhe gbe abi aghiusomhi ni a ghie ghi egbō iJeta. ⁹ IJemhisi ali iPita ali iJoni ni a lese khi wewe e mu oni igbaa oyi eni e mie iJesu iKirisiti suo mhuē, e me khi Eshinegba o ri isomhopfa na ke na mhemhe ali iBanabasi, e ro lama na anye, anye ke tsabo oni usomhi onete oghuo ye egbō iJeta. Wewe e tsabo ye egbō iJu. ¹⁰ Emini e ngme khi anye ke kpaghie egbō ni ea mholi obō, igho mhi li roshēka riele oli.

IPolu o gueye iPita khi o a gue riele

¹¹ Abi iPita o ro bhale Atioki, mhi gueye oli gboo ghemhe ghe e khi o a gue kia, irari khi o lue. ¹² Neni egbō ni iJemhisi o ghie usomhi, e bhale, iPita o kpe nu egbō iJeta a le eminale kugbe, ama abi eni egbō e ro bhale, o ti je ukhokho na iJeta egho, irari khi ulishi oyi egbō ni e lie khi ogbō o mema shele-a oo mu oli. ¹³ Egbō iJu eni e miesuo enekpole e li kuma

† 2:6 Li ze iDeut 10.17

ọli ọ riẹlẹ ikokoalo, ya ramhi khi oni ikokoalo o li ri iBanabasi kuma wẹ ọ.

¹⁴ Abi mhi rọ mẹ khi, ẹa rọte ode igeşikia abi oni usomhi onete o ngme, mhi la ukpẹloe eni ẹgbọ liẹ iPita, “Ogbọ iJu u khi, ama wa ngeli abi ọgbọ iJeta. Elo o zẹ ni u ke rọ nono ni i ri itoto mu ẹgbọ iJeta ke riẹlẹ ighuighue eyi ẹgbọ iJu?”

¹⁵ “Egbọ iJu a bia awa, awa aa khi ẹgbọ iJeta ena olamhe,” abi a lu wẹ. ¹⁶ Lẹse khi aa ya pfa na ọgbọ irari khi ọ ri ushi a gbe akanya, ama itobọ irudunga iJesu iKirisiti. Ighọ awa li li ri udu nga iJesu iKirisiti ni a rọ pfa na awa. Oa khi itobọ irushi-gbe akanya, irari khi ọgbọkhoghwo oa la ọ ni a ya pfa na irari khi ọ dobe ri ushi a gbe akanya. †

¹⁷ “Abi awa liẹ dua ni awa khi eni a pfa na elemhi iKirisiti, eri o rọkhasẹ khi ena olamhe awa khi. Oghọ khi eri iJesu ọ mu ẹ ma olamhe? Iiye o, oa khi igho! ¹⁸ Mhi kha riẹlẹ emini mhi guoghọ-a rọkọ, eri mhi rọkhasẹ khi ọgbushia mhi khi. ¹⁹ Irari khi rọte ushi mhi te ghu pfa ushi, ni mhi dobe la ọ na Eshinegba. ²⁰ A she li ta mhe ma apfida abi a li ta iJesu ma apfida, ali khi aa ke khi mhemhe mhi ke la agbọ, ama iKirisiti ọ ke la agbọ oyemhe. Agbọ ni mhi la elemhi idiegbe oyemhe memena, irudunga Omi Eshinegba mhi te la ọ, ni ọ nono ingme oyemhe, ni ọ ghu-a, ni ọ ri agbọ oyoli na mhe. ²¹ Mhi aa ri obọ gbe isomhelemhi oyi Eshinegba nye, irari khi ini o khia khi itobọ iri-ushi-gbe akanya ọgbọ rọ pfuase lo, eghuli afue iKirisiti ọ ghu!”

3

† **2:16** Li zẹ Iwolo 143.2; iRom 3.20,22

Irudunga tşę o khi ode imiepfuese

¹ Eę eyęghę ęgbọ iGalesha! Oghuo ọ ri ogbhọ na ę le? Ukpęloe oyęę a la ri iJesu iKirisiti khase gboo khi eri a ta li ma apfida. ² Mhia nono ni mhi rọte obọ oyęę leşę emhi oghuo. Eri a mie Ayemhę oyi Eshinegba irari khi a ri ushi gbe akanya, abi khi irari khi a mie emini a suọ suọ? ³ Eeyęghę a ghọ khi? A kha ri Ayemhę oyi Eshinegba gba ekele se, a tigbe ę dua ni a ri ekpabọ ọgbọ gbe oni akanya pfo? ⁴ Eri a na lina mę osoli shi afue? Ini afue a mę osoli, ⁵ Ayemhę oyi Eshinegba ni ọ rọ na ę, ali ikanya oshabọ ni ọ gbe iteva oyęę, itobọ khi a ri Ishi eyi iMosisi gbe akanya lọ abi khi irari emini a mie ingme oyi iKirisiti suọ, o zę ni ọ rọ rięle ena?

⁶ A sa ingme oyi Aburaamu ghue, “Eri ọ mie Eshinegba suọ ni a rọ pfa na li khi ọ pfuase.”* ⁷ A leşę ọli shọ, khi ęgbọ ni e miesuọ, e khi imi Aburaamu.† ⁸ Ebe-no-pfuase o kpę ngme ọli shi eke khi Eshinegba ọ ya rọte irudunga oyi ęgbọ iJęta pfa na wę, ọ gue oni ungmehi ye Aburaamu ọọ li, “A ya rọte obọ oyę khivose na ishishi ena ekagbọ nya.”‡ ⁹ Irarighọ, eni e mhọli irudunga a ya khivose na abi a li khivose na Aburaamu, ikhi ọmose irudunga.

¹⁰ Ęgbọ nya ni e ri egbe da iri-ushi gbe akanya, a pfi unu na, irari khi a keke ọli khi, “Unu a pfi na ọgbọ ni ọa da ri emini a keke shi ebe ushi nya gbe akanya.”§ ¹¹ Mena, aa mę ọgbokhoghuo ni a pfa na odalo Eshinegba irari khi ọ ri ushi gbe akanya, itobọ khi, “Eni e pfuase, irudunga o rę wę ya la

* **3:6** Li zę Igbae 15.6; iRom 4.3 † **3:7** Li zę iRom 4.16 ‡ **3:8** Li zę Igbae 12.3 § **3:10** Li zę iDeut 27.26

agbọ.”* 12 Ode irudunga o kiḍa shi ode ushi, ni ọọ, “Oni ọ da ri ushi gbe akanya, ushi ọ rọ ya la agbọ.”† 13 Eri iKirisiti ọ pfa awa shi eke elemhi ipfiunu-a oyi ushi abi ọ li khi oni a pfi unu na irari oyawa, irari khi a keke ọli khi, “Unu a pfi na ọgbokpa ni a soli-a shi ọọra.”‡ 14 Eri ọ pfa awa shi eke ni ikhivose eyi Aburaamu e ramhi ẹgbọ iJeta egbe, rọte iJesu iKirisiti, ni awa me ikhivose oyi ishobọ Ayemhen-ọ-pfuase rọte irudunga.

Oni Ushi ali oni ishobọ

15 Inyoghuo a ze mhe ri angeli ẹlekpā rue irokhokho. Ezeze abi ọgbokhoghuo ọa li dobe ya shishi ọ-a, wekhi eri ọ dobe ya rọ ma ilamasho, ni Eshinegba ọ nu ọgbọ lama sho, ni o she gbola migha. Igho oni ingme onana o li. 16 Oni ishobọ, Aburaamu ali omioli a shi ọli na. Ebe-no-pfuase ọa lie, “Ali imioli,” ni e khi ebubu ẹgbọ, ama, “Ali omie,” ni ọ khi ọgbọ ọghuo, ni ọ khi iKirisiti. § 17 Emini mhi ri ona ngme khi, ushi ni a tigbe rọ lasele abi ikpe egbhue uye ali uye ali igbe (430) e rọ dose se, ọa guoghọ oni ishobọ ni Eshinegba ọ shi-a, ni a yele oni ekha-a.* 18 Ini oni ugu o migha shi ushi lo, ọa kha ke migha nga ishobọ, Ama rọte isomhemhi oyi Eshinegba ọ rọ shi oni ishobọ na Aburaamu.†

19 Elo o ze ni a rọ ri ushi bhale? Eri a ri ushi bhale ni a rọ rokhase khi awa lamhe. Eri a roli shi eke ramhi eghẹghe ni omiomi Aburaamu ni a ri ele ishobọ khe ọ rọ ya bhale. Eshinegba ọ ri oni ushi

* 3:11 Li ze Abak 2.4 † 3:12 Li ze iLev 18.5 ‡ 3:13 Li ze iDeut 21.23 § 3:16 Li ze Igbae 12.7 * 3:17 Li ze Okiali 12.40 † 3:18 Li ze iRom 4.14

na iḡeni tiemhile na iMosisi ni ọ la iteva ọgbọ ali Ẹshinẹgba. ²⁰ Awa kha da ngme ingme ọmigha-na ọgbọ ne, o rọkhasẹ khi ẹgbọ aava e mema lasele shi aghọ, Ama Ẹshinẹgba lọlighuo ọ shi oni ishobọ ona, Ẹshinẹgba ọghuo, ọ khi.

Emini ushi o migha shi

²¹ Eri ushi o ke a zu ishobọ oyi Ẹshinẹgba ode? Iiye o! Irari ini eri a ri ushi bhale ni o ri agbọ ke na ọgbọ lọ, a kha ri irarighọ pfa na ọgbọkpa ini ọ ri ushi gbe akanya. ²² Ama Ebe-no-pfuase o ngme ghọ khi ekpabọ olamhẹ o mhese a na agbọ nya, ni a ba bhale ya ẹ khi emini a shobọ, ni a rọ ọ na ọgbọ rọte obọ oyi iJesu iKirisiti ni a rọli na ẹgbọ ni e miesuo.

²³ Neni oni irudunga o bhale, eri ushi o mu awa ighumha, o pfi awa okpe ramhi ni irudunga o rọ bhale. ²⁴ Eri a ri ushi na awa ni o sese awa ode ramhi ni iKirisiti ọ rọ bhale, ni a rọte irudunga pfa na awa. ²⁵ Memena abi ẹghẹghẹ irudunga o rọ bhale, ushi ọa ke ẹ sese awa ode.

Imi Ẹshinẹgba

²⁶ Ẹẹ nya, imi Ẹshinẹgba a khi rọte irudunga oyi iJesu iKirisiti. ²⁷ Irari khi ẹẹ nya ni a batazi elemhi iKirisiti, a she ri iKirisiti sọ. ²⁸ Ikhioda ọa la ọ na ọgbọ iJu ali ọgbọ iJeta, wekhi ikhioda o la oghumha, ali oni ọa khi oghumha, wekhi omose ali ọkpotso, irari khi ẹẹ nya, ọghuo a khi shi iJesu iKirisiti ọ. ²⁹ Ini a khi ọnayi iKirisiti, ẹghẹghẹ aghọ imi Aburaamu a khi, a khi eni e mhọli okemhi shi oni ishobọ.†

† 3:29 Li zẹ iRom 4.13

4

¹ Emini mhia ngme khi, ini oni oni ugu o gọ lu o da kie khi ukuku ọmọ ne, ọa kiọda shi oghumha o, ama lọli o kie ya mhọli eni apfẹ nya. ² Eri o kiele ya la obọ oyi eni e ri ẹloe ẹ khu ọli, ali eni a ri eni ugu nga obọ ne, ya ramhi ẹghẹghẹ ni itali o shi shi eke, ni o rọ ya womhẹ ẹloe. ³ Ighọ o li khi shi awa egbe. Ighumha eyi iyemhẹ ni ẹ mhẹsẹ na agbọ nya, e mhẹsẹ ẹ na awa neni awa mhọli iwomhẹloe elemhi ayemhẹ. ⁴ Ama abi oni ẹghẹghẹ o rọ ramhi, Ẹshinẹgba o ghie omiọli ni ọkpotso o bia, ni a bia shi ẹghẹghẹ ushi, ⁵ ni o rọ tsumhi ẹgbọ ni ushi o mhẹsẹ ẹ na, ni awa tẹ eni a lu Imi Ẹshinẹgba. ⁶ Itobọ khi a khi imiọli, Ẹshinẹgba o rọ ghie Ayemhẹ oyi Omiọli bhale udu oyawa, Ayemhẹ ni o tsesẹ liẹ, “Itamhẹ, Itamhẹ.” ⁷ Itobọ ona, wa a ke khi oghumha ama omiọli, abi u ke rọ khi omiọli eghọ, Ẹshinẹgba o she rẹ mie oni ishobọ. *

Omuegbe ni iPolu o mhọli na ẹgbọ iGalesha

⁸ Ẹghẹghẹ ni o dọsẹ ni aa rọ kpẹ lesẹ Ẹshinẹgba, a khi ighumha eyi emini e khi ilitsa ni ẹa khi Ẹshinẹgba. ⁹ Ama memena ni a ke rọ lesẹ Ẹshinẹgba, ali abi Ẹshinẹgba o ke rọ lesẹ ẹ ena, elọ o zẹ khi a nono ni a nyenẹ egbe gbo deba iyemhẹ afuẹ ni ẹa mhue ekpabọ? Elọ o zẹ ni a rọ o nono ni e gbo mu ẹ ighumha utonuzi-eva? ¹⁰ A ri ẹloe ẹ shi ogbele na ke ali iki ali ẹghẹghẹ ali ikpe. ¹¹ Ulishi ọọ mu mhẹ irari khi o li mhẹ ẹloe abinẹ khi eri mhi pfuse ẹghẹghẹ-a shi ẹ egbe shi afuẹ.

¹² Mhia lema ẹ, inyoghuo a li abi mhi li, irari khi eri mhi li abi a li. Aa li mhẹ ingmobe. ¹³ A

* 4:7 Li zẹ iRom 8.15-17

yelele, khi elemhi umha ze mhi la ni mhi ro tse abo usomhi onete ye e odo-ode. ¹⁴ Abi o tseku khia khi ughuamhi oyemhe khi eri o li abi anasemhe na e, aa ri elo e gbe mhe, aa kie mhe. Ochogh, eri a kpe abo mie mhe abine khi agheni Eshinegba mhi khi, abi a kha li mie iJesu iKirisiti. ¹⁵ Elo o li oghel oye? Mhi dobe ya pfi otsele khi ini o ze ya li lo khi a kha ga vuonyo ikpamhi alo eye e na mhe. ¹⁶ Mhi she mele o be e-a irari khi mhi gue igesikia ye e?

¹⁷ Egb o nono ni e ti e ma egbe, ama o a khia ode ni o ti o khi. Emini e nono khi ni e re e mele epfese-a shi anye o, ni a khi eni e mholi omuegbe na we. ¹⁸ O ti ni ogbo o mholi omuegbe ini o da khi eminete o mholi oli shi, ali ni o ke mholi oli egheghe kpa, o a khi ini mhi da lese la agho tse. ¹⁹ Imimhe, egbe e to mhe shi ingme oye, abi okpotso ni oku o to, ni a ro bhale ya e khi a me iKirisiti agbo oye. ²⁰ Abi a khe khi mhi nu e la, ni mhi mu uruli oyemhe pfi, irari khi egbe e pfo mhe-a shi ingme oye e!

Ega ali iSera

²¹ A gweye mhe ghue, ikhi ee ni a nono ni a khi eni ushi o mhesa a na, a lese abi ushi o ngme?

²² Irari khi a keke oli khi Aburaamu, o bia eniye emose aava, oghuo oo khi omi okpotso oghumha, onokpole o khi omi ogbo.† ²³ Om o ni oghumha o bia na li, eri a bia li rote ode na tse, ama oni egbegbi okpotso o bia, a bia li rote ode ishobo.

²⁴ Eni ingme ena nya e mholi emini e migha shi, irari khi ikpotso aava ena, ilama na egbe eva e khi. Ilama-negbe oghuo o khi ona ukhomhi ute iSinai, o bia eniye ni e ya khili ighumha. Lo li khi

† 4:22 Li ze Igbae 16.15; 21.2

Ega. ²⁵ Mena, Ega o migha shi ute iSinai na eke Arebia ni o khili eoli iJerusalemu, irari khi eri o nu imioli khili ighumha. ²⁶ Ama inyọ awa o khi eoli iJerusalemu ni o la odane, omi ogbọ o khi. ²⁷ Irari khi a keke ọli, e li:

“Ke ghele, yeye aga
ni ọa bia eniye,
ri oghẹle tseşe leghe,
yeye ni oku ọa to ghue,
irari khi ọkpotso ni a kie,
o mhọli eniye ni e bu
dọse ọkpotso ni o mhọli ọdọ.”†

²⁸ Memena, inyoghuo-mhe, eniye ishobọ a li khi ezeze abi Aziki o li khi omọ ishobọ. ²⁹ Abi o kpe li oni eghẹghẹ, ni omọ ni a bia elemhi idiegbe, ọọ li mu okhọli vule shi omọ ni a ri ekpabọ Ayemhe oyi Eshinegba bia o, igho o kie li memena.§ ³⁰ Ama se Ebe-no-pfuase o ngme? Oo, “Khu ọkpotso oghumha ali omioli vu, irari khi omi ọkpotso oghumha ọa tigbe ya nu omi egbegbi ọkpotso kemhi ugu.”* ³¹ Irarigho, inyoghuo, awa aa khi eniye eyi ọkpotso oghumha ama eniye eyi ọkpotso ni o khi omi ogbọ.

5

Irueole ni o la obọ oyi iKirisiti

¹ IKirisiti o she rue awa o le. Irarigho, a migha gbaa shi oni irueole, a khi ke gbo ze ni a gbo ya nyene ri egbe e khi ighumha oyi ushi.

† 4:27 Li ze Aza 54.1 § 4:29 Li ze Igbae 21.9 * 4:30 Li ze Igbae 21.10

² A ghe i! Mhemhe iPolu, mhi gue e ye e khi, akanya ni iKirisiti o gbe oja ke ya mholi elele okhoghwo na e, ini a ya shele-a. ³ Mhi gbo gue e ye ogbo ni o da ze ni a shele oli-a ne, o mema ya ri ushi nya gbe akanya. ⁴ Ee ni a dua ni a khi eni a pfa na rote iri-ushi gbe akanya, aa ke mholi oboshi ikanya ni iKirisiti o gbe, a she de okhale oyoli-a. ⁵ Ama rote irudunga awa te lolo migha a khe ipfuase ni awa ri udu nga rote elemhi Ayemhe-nopfuase. ⁶ Irari khi elemhi iJesu iKirisiti, oshela ali umha-shele-a ea mhu e eleli. Emini o mema mu egbe khi irudunga ni o mholi inono.

⁷ A kpe gue e kia. Oghwo o mu alo nyene ni aa ke ro o deba igesikia? ⁸ Oni o lina mu e alo nyene, oja rote oboshi iKirisiti oni o lu e bhale. ⁹ "Ogbo obe otuoghwo o dobe ya yese egbo eni e bu-a. Eri o li abi umiesobo oghwo, ni o ri oili e gbolo enekpole-a."* ¹⁰ Ama mhi regbenga e khi eyi Onomhu e khi. Onana o re mhe lese gboo khi emini mhi gueye e a ya ri ele, khi aa ya ri ele emini ogboese o gueye e. Ogbo ni oo nase e, o ya ri ukhomhi kpe o, onini o ri ele khi.

¹¹ Inyoghwo, ini ishele-a mhi kiele ro tse abo lo, abi egbo eghwo ee ngme, elo a mu okholi vule shi mhe o ke shi? Ini o khi igho lo, ungmehi apfida oja kha ke ri elemhi ke bi. ¹² Egbo ni e na ri ingme oshela a nase e ena, mhi kha ga lie e bie wali egbewe-a.

Agbo na elemhi Ayemhe

¹³ Ee oye e, inyoghwo-mhe, eri a lu e ni a la elemhi epfua. Ama a khi ze ni a ri oni epfua ona ke ri ele

* 5:9 Li ze 1 iKori 5.6

emini idiegbe olamhẹ oye ọọ nono. Ochoghọ a ri inono ke ga egbe ẹ. ¹⁴ Irari khi emini a rọ zẹ ushi nya ukhomhi khi, “Nono ọnuzava ọye abi u li nono egbie.”† ¹⁵ Ini a mu okhọli vule ẹ shi egbe ẹ ọ, ni a rọ ọ khu egbe ẹ, a mhue ẹgbhẹ ini a khi a ya pfuse egbe ẹ-a.

¹⁶ Emini mhia ngme khi, a ke kia okiali elemhi Ayemhẹ, ẹghẹghẹ aghọ aa ya riẹ ẹ ọghuemhẹ oyi idiegbe olamhẹ. ¹⁷ Irari khi idiegbe, ọbe Ayemhẹ o khi, ali khi emini Ayemhẹ ọ nono, eri ẹ zu ọghuemhẹ idiegbe olamhẹ ode. Wewẹ ava-ava ọbe e khi shi egbe ọ, loli o zẹ khi u waa dobe a riẹ emini u wa nono ni u riẹ.‡ ¹⁸ Ama ini Ayemhẹ ọ rẹ ẹ kia, waa tigbe ya riẹ ẹ oghumha oyi ushi.

¹⁹ Emini ikanya idiegbe olamhẹ ẹẹ gbe na; Itsẹbo, ikanya ichimhi na itsẹbo ali angeli efi-ala, ²⁰ ikhumhi igaga, ali ogbhọ ipfipfi, ibiselemhi, umha lama a na egbe, ofuma ikpekpe, ofu imhọli, ikanya ukphe, elemhi ibibi, ikemhi egbe, ²¹ Idegbe-okonyo, idonyo dose, iye-ukue ni a la li itsẹbo, ali emhi elese eghoghọ. Mhi tse agua ye ẹ, abi mhi kpẹ li tse ọli ye ẹ, khi ẹgbọ ni e da a ngeli angeli eghoghọ ne khi ẹa ya mhọli okemhi shi Eghiele oyi Eshinẹgba.

²² Emini Ayemhẹ ọ rọ ọ lasele khi; Inono, oghẹ ẹ, opfomhẹ, irabomudu, isomhelemhi, onete, izẹ-riegbeda, ²³ Ipfomhẹ, igue-regbekia. Ushi ọa ya mu ọgbọ shi ọ ini ọ riẹ enana nya. ²⁴ Eni e khi eyi iJesu iKirisiti e she rọte idiegbe olamhẹ oyewẹ ali ọghuemhẹ eyewẹ nya ma apfida. ²⁵ Aborokhia khi Ayemhẹ ọ ri awa a kia eghọ, awa ke deba ẹte-awe

† 5:14 Li zẹ iLẹv 19.18 ‡ 5:17 Li zẹ iRom 7.15-23

eyoli. ²⁶ Awa khi ke mu egbawa ẹloe dọsẹ ode, yẹsẹ elemhi ke bi egbe, ni o ri awa a ke kpe ofuma deba egbe.

6

A ke riẹlẹ onete na egbo nya

¹ Inyoghuo-mhẹ, a kha bhale ya ẹ khi a mu ogbokhoghuo shi olamhẹ, ẹẹ ni a la elemhi ayemhẹ, a kuegbe-a sheshe ọli shi ode fiẹ. Ama a ke to egbe ẹ okpe, ini a khi li de pfilo imufe. ² A kpaghiẹ egbe ẹ itsua, ini a li igho, a ya riẹlẹ oghuemhẹ oyi iKirisiti. ³ Ini ogbọ o dabi khi loli mu ẹloe, ni a ro bhale ya ẹ khi ọa khi emhikhoghuo, egboli ọọ di. ⁴ Ogbogbo o ke mu angeli eyoli fe ni o bino ini e ti. Oni eghẹghe, o tigbe me asha a titi egboli. O khi ri egboli khokho ogboses. ⁵ Ogbogbo o tsua itsua eyoli.

⁶ A ke ri eminente nya somhi ogbọ ni ọọ sese ẹ emini Eshinẹgba o ngme.

⁷ Khi di egbe ẹ. Ogbokhoghuo ọa dobe ya ghagha Eshinẹgba. Emini ogbọ o ro ko, loli o ya khiẹsẹ. ⁸ Ini ogbọ o deba oghuemhẹ oyi idiegbe olamhẹ oyoli ro ko o khiẹsẹ epfua. Oni o ro ko ro ri egbe mu Ayemhẹ, o ya khiẹsẹ agbo na agboagbo. ⁹ A khi ze ni onete iriẹlẹ o khuese awa, irari khi o kha ramhi oni eghẹghe, awa ya khiẹsẹ, ini ọa da losẹ awa. ¹⁰ Irarigho, abi awa da mholi oni eghẹghe kpa, awa ke riẹlẹ onete deba ogbokpa, tee-tee, ena omhue-apfe irudunga.

Itse-agua ni o kpukhokho

¹¹ A bino ikpamhi alo ebe eniemhi ni mhi ri obo oyemhẹ keke ghi ẹ. ¹² Egbo ni ẹẹ riẹlẹ abamemhẹ, ẹ dua ni e ri itoto ti ẹ shi ishele-a, emini o ze ni e

rọ ọ li ighọ khi, ẹa nono ni a mu okhọli vule shi wẹ ọ shi osẹsẹ oyi apfida oyi iKirisiti. ¹³ Egbegbi eni e shẹlẹ-a, ẹa ri ushi ẹ gbe akanya, ama ẹ nono ni a shẹlẹ ẹ-a, ni e ba mẹ asha ke neta ọmọse khi e rẹ ẹ shẹ shẹlẹ-a. ¹⁴ Ama mhi aa tigbe ri emhikhoghuo ya neta ọmọse, ini ọa li khi ingme oyi apfida oyi iJesu iKirisiti Ọnọmhue ọyawa. Itobọ oni apfida ona, mhi rọ ghu pfa ọghuẹmhe agbọ, ọghuẹmhe agbọ o ghu pfa agbọ oyẹmhe. ¹⁵ Ishẹlẹ-a ali umha shẹlẹ-a ọa mhọli abi o ngme, emini o mu egbe khi, ni a rọ riẹlẹ ọgbọ bia elemhi iKirisiti. ¹⁶ Opfọmhe ali ilẹlemhi e ka nu eni e deba osẹsẹ onana la elemhi agbọ oyẹwẹ, li shi ẹgbọ iZireni eyi Eshinegba.

¹⁷ Ọzukhomhi emhikpa khi, ọgbọkhoghuo ọ khi ke nase mhe, irari khi mhi mhọli emeli oyi iJesu shi egbe oyẹmhe.

¹⁸ Inyoghuo-mhe, okhale oyi iJesu iKirisiti Ọnọmhue ọyawa, ọ ka nu ayẹmhe oyẹ ẹ nya la. Atse.

Ebe-No-Pfuasę Ishobo Onogbo
New Testament in Ivbie North-Okpela-Arhe
(NI:atg:Ivbie North-Okpela-Arhe)

copyright © 2012 Wycliffe Bible Translators, Inc.

Language: Ivbie North-Okpela-Arhe

Translation by: Wycliffe Bible Translators, Inc.

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789194797

The New Testament

in Ivbie North-Okpela-Arhe

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

PDF generated using Haiola and XeLaTeX on 11 Nov 2022 from source files
dated 29 Jan 2022

03be06b0-68fd-500b-b9a9-6bca4b63979a